

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱԶԳԱՅԻՆ ԺՈՂՈՎԻ ՆԱԽԱԳԱՀ

պարոն ԳԱԼՈՒՍՏ ՍԱՀԱԿՅԱՆԻՆ

Հարգելի պարոն Սահակյան

Ձեզ ենք ներկայացնում Հայաստանի Հանրապետության կառավարության եզրակացությունը Հայաստանի Հանրապետության Ազգային ժողովի պատգամավոր Էդմոն Մարտիրոսյանի՝ օրենսդրական նախաձեռնության կարգով ներկայացրած «Հայաստանի Հանրապետության քրեական օրենսգրքում փոփոխություն կատարելու մասին» Հայաստանի Հանրապետության օրենքի նախագծի (Պ-959-03.03.2016-ՊԻ-010/0) վերաբերյալ:

Օրենքի նախագծով (այսուհետ՝ նախագիծ) առաջարկվում է Հայաստանի Հանրապետության քրեական օրենսգրքի 153-րդ հոդվածի սանկցիայից հանել տուգանքը՝ որպես պատժատեսակ և թողնել միայն ազատազրկման ձևով պատիժը: Նախագծի հիմնավորման մեջ նշվում է, որ տուգանքը չափազանց մեղմ պատժատեսակ է նման արարքի կատարման համար և չի կարող ապահովել պատժի՝ Հայաստանի Հանրապետության քրեական օրենսգրքի 48-րդ հոդվածով սահմանված նպատակները:

Հաշվի առնելով նախագծում բարձրացված հարցերի առանձնահատկությունները՝ կարծում ենք առաջարկվող կարգավորումներին անհրաժեշտ է անդրադառնալ ինչպես իրավական, այնպես էլ քաղաքական տեսանկյունից:

Հայաստանի Հանրապետության քրեական օրենսգրքի 153-րդ հոդվածի սանկցիան նախատեսում է խստությամբ, բնույթով և հանցագործի նկատմամբ ներգործության առանձնահատկություններով պայմանավորված տարաբնույթ պատժատեսակներ՝ տուգանք և ազատազրկում որոշակի ժամկետով: Պատժի տեսակների բազմազանությունը հիմնված է Հայաստանի Հանրապետության քրեական օրենսգրքի 10-րդ հոդվածում ամրագրված արդարության և պատասխանատվության անհատականացման սկզբունքի վրա և յուրաքանչյուր քրեական գործով հնարավորություն է ընձեռում դատարանին հաշվի առնել հանցագործության և հանցագործի վտանգավորության աստիճանը, դրանով իսկ նշանակել արդարացի պատիժ, որն առավելագույնս կնպաստի ինչպես սոցիալական արդարության վերականգնմանը, այնպես էլ դատապարտյալի ուղղմանը և նոր հանցագործությունների կանխմանը: Այդ առումով գտնում ենք, որ նախագծի ընդունմամբ կսահմանափակվի պատիժ նշանակելիս դատական հայեցողության շրջանակը՝ դատարանը պարտադրված կլինի Հայաստանի Հանրապետության քրեական օրենսգրքի 153-րդ հոդվածով մեղավոր ճանաչված անձանց նկատմամբ կիրառել բացառապես ազատազրկում որոշակի ժամկետով պատժատեսակը նաև այն դեպքերում, երբ որոշի, որ տվյալ դատապարտյալին առավել նպատակահարմար է պատժիչ դաստիարակչական ներգործության ենթարկել առանց վերջինիս հասարակությունից մեկուսացնելու (խոսքը վերաբերում է այն դեպքերին, երբ գործով առկա են մեղմացող մի շարք հանգամանքներ, օրինակ՝ պատիժ նշանակելու պահին հանցավորի խնամքի տակ գտնվում է մինչև 14 տարեկան երեխա, հանցանք կատարելու կամ պատիժ նշանակելու պահին հանցավորի հղիությունը և այլն): Ելնելով նշվածից՝ գտնում ենք, որ առաջարկվող օրենսդրա-

կան կարգավորումը հակասում է Հայաստանի Հանրապետության քրեական օրենսգրքի 10-րդ հոդվածում ամրագրված արդարության և պատասխանատվության անհատականացման սկզբունքին, ինչպես նաև 61-րդ հոդվածում սահմանված պատժի նշանակման ընդհանուր սկզբունքներին, մասնավորապես, նշված հոդվածի 3-րդ մասին, համաձայն որի հանցագործության համար նախատեսված պատիժներից առավել խիստը նշանակվում է, եթե նվազ խիստ տեսակը չի կարող ապահովել պատժի նպատակները:

Հարկ է նշել նաև, որ նախագծի ընդունումը չի բխում 2015 թվականի հունիսի 4-ին Հայաստանի Հանրապետության կառավարության կողմից հավանության արժանացած Հայաստանի Հանրապետության նոր քրեական օրենսգրքի հայեցակարգում ամրագրված մոտեցումներից, որոնք ուղղված են պատժի համակարգում առկա թերությունների վերացմանը: Այսպես, հայեցակարգի համաձայն, այսօրվա պայմաններում ոչ մեծ և միջին ծանրության հանցագործություններին հաճախ փաստորեն հետևում են նույն սանկցիաները, ինչ որ ծանր և առանձնապես ծանր հանցագործություններին: Հանցավորությունը, սակայն, դրանից չի նվազում: Ավելին, անպատժելիության մթնոլորտն ավելի է խորանում: Այդ իմաստով ազատագրկման հետ չկապված պատիժների կիրառումը, երբ դա, իհարկե, հիմնավորված է, պետք է դառնա իրավակիրառական տարածված պրակտիկա, որի հիմնական նպատակը քրեական պատասխանատվության անխուսափելիության, այլ ոչ թե չափազանց խստության ապահովումն է:

Ներկայիս պայմաններում առավել կարևորվում է որոշակի կատեգորիայի հանցագործությունների համար ազատագրկմանն այլընտրանք հանդիսացող պատժատեսակների կիրառման անհրաժեշտությունը: Հասարակությունից տևականորեն մեկուսացնելու այլընտրանքները հանդիսանում են հասարակությունը քրեականացումից, դատապարտյալներին՝ հանցավոր ենթամշակույթին սերտաճելուց խուսափելու գործուն միջոցներ: Հենց այլընտրանքային պատիժները պետք է դառնան քրեական սանկցիաների նոր

համակարգի առավել պահանջված բաղադրատարրեր, ինչը կնպաստի նաև քրեակատարողական հիմնարկների ծանրաբեռնվածության նվազեցմանը:

Միջազգային փորձի ուսումնասիրությունը ևս վկայում է այն մասին, որ տվյալ հանցանքի համար նախատեսված սանկցիան որպես պատժատեսակ պետք է նախատեսի նաև տուգանք: Այսպես՝

1) Գերմանիայի Դաշնային Հանրապետության քրեական օրենսգրքի 107ա և 107բ հոդվածները որպես պատժատեսակ ազատագրկման հետ մեկտեղ նախատեսում են նաև տուգանք.

2) Շվեյցարիայի Համադաշնության քրեական օրենսգրքի 281-րդ հոդվածը նույնպես ազատագրկում պատժատեսակի հետ մեկտեղ նախատեսում է տուգանք.

3) նույն մոտեցումը բնորոշ է նաև Ռուսաստանի Դաշնության քրեական օրենսգրքին, որի 19-րդ գլխում ընդգրկված հոդվածներով պատասխանատվություն է սահմանվում մարդու և քաղաքացու սահմանադրական իրավունքների դեմ ուղղված հանցավոր ոտնձգությունների համար: Նշված գլխի բոլոր հոդվածներում տուգանքը ևս նախատեսված է ազատագրկում որոշակի ժամկետով պատժատեսակի հետ մեկտեղ:

Ամփոփելով՝ Հայաստանի Հանրապետության կառավարությունը գտնում է, որ՝

1) նախագծի ընդունմամբ կխաթարվեն Հայաստանի Հանրապետության քրեական օրենսգրքով նախատեսված մի շարք նոր-երաշխիքներ, ինչպիսիք են՝

ա. 10-րդ հոդվածում ամրագրված արդարության և պատասխանատվության անհատականացման սկզբունքը,

բ. 61-րդ հոդվածում սահմանված պատժի նշանակման ընդհանուր սկզբունքները.

2) առաջարկվող օրենսդրական կարգավորումը չի բխում Հայաստանի Հանրապետության կառավարության կողմից հավանության արժանացած Հայաստանի Հանրա-

պետության նոր քրեական օրենսգրքի հայեցակարգում ամրագրված մոտեցումներից և միջազգային փորձից:

Անդրադառնալով նախագծին քաղաքական տեսանկյունից՝ պետք է նշել, որ, նախընտրական գործընթացներով պայմանավորված, առաջարկվող կարգավորումն առաջացնում է մի շարք քաղաքական հարցադրումներ, որոնք անհրաժեշտ է լայն քննարկման առարկա դարձնել: Հետևաբար, չնայած նախագծով առաջարկվող իրավական խնդրահարույց կարգավորումներին՝ Հայաստանի Հանրապետության կառավարությունը, հաշվի առնելով ընտրական գործընթացների նկատմամբ հանրության վստահության ամրապնդման և նախագծով բարձրացվող հարցերի քննարկման կարևորությունը, հավանություն է տալիս օրենքի նախագծին:

Միաժամանակ հայտնում ենք, որ, ներկայացված օրենքի նախագիծը Հայաստանի Հանրապետության Ազգային ժողովում քննարկելիս, հարակից զեկուցմամբ հանդես կգա Հայաստանի Հանրապետության արդարադատության նախարար Արփինե Հովհաննիսյանը:

Օրենքի նախագծի ընդունման դեպքում Հայաստանի Հանրապետության կառավարության որոշման կամ այլ իրավական ակտի ընդունման անհրաժեշտություն չի առաջանում:

Կից ներկայացվում են օրենքի նախագծի կարգավորման ազդեցության գնահատման եզրակացությունները:

Հարգանքով՝

ՀՈՎԻԿ ԱՐՐԱՀԱՄՅԱՆ

ԵԶՐԱԿԱՑՈՒԹՅՈՒՆ

ԱՌՈՂՋԱՊԱՀՈՒԹՅԱՆ ԲՆԱԳԱՎԱՌՈՒՄ ԿԱՐԳԱՎՈՐՄԱՆ ԱԶԴԵՑՈՒԹՅԱՆ ԳՆԱՀԱՏՄԱՆ

«Հայաստանի Հանրապետության քրեական օրենսգրքում փոփոխություն կատարելու մասին» Հայաստանի Հանրապետության օրենքի նախագծի ընդունման դեպքում

«Հայաստանի Հանրապետության քրեական օրենսգրքում փոփոխություն կատարելու մասին» Հայաստանի Հանրապետության օրենքի նախագծի ընդունումն առողջապահության բնագավառի վրա ազդեցություն չի ունենա:

Եզրակացություն

«Հայաստանի Հանրապետության քրեական օրենսգրքում փոփոխություն կատարելու մասին» ՀՀ օրենքի նախագծի սոցիալական պաշտպանության ոլորտում կարգավորման ազդեցության գնահատման

«Հայաստանի Հանրապետության քրեական օրենսգրքում փոփոխություն կատարելու մասին» ՀՀ օրենքի նախագծի (այսուհետ՝ նախագիծ) սոցիալական պաշտպանության ոլորտում կարգավորման ազդեցության գնահատումը կատարվել է «Իրավական ակտերի մասին» ՀՀ օրենքի 27.1 հոդվածի և ՀՀ Կառավարության 2010 թվականի հունվարի 14-ի թիվ 18-Ն որոշման համաձայն:

Նախագծի սոցիալական պաշտպանության ոլորտում կարգավորման ազդեցության գնահատումը կատարվել է սոցիալական պաշտպանության ոլորտի և դրա առանձին ենթաօլորտների իրավիճակի բնութագրիչների և դրանց ինդիկատորների հիման վրա:

Նախագիծը՝

ա) ռազմավարական կարգավորման ազդեցության տեսանկյունից ունի **չեզոք ազդեցություն**.

բ) շահառուների վրա կարգավորման ազդեցության տեսանկյունից ունի **չեզոք ազդեցություն**:

ԱԶԴԵՅՈՒԹՅԱՆ ԳՆԱՀԱՏՄԱՆ ՄԱՍԻՆ ԵԶՐԱԿԱՑՈՒԹՅՈՒՆ

<<Հայաստանի Հանրապետության քրեական օրենսգրքում փոփոխություն կատարելու մասին>> Հայաստանի Հանրապետության օրենքի նախագծի բնապահպանության բնագավառում կարգավորման

1. <<Հայաստանի Հանրապետության քրեական օրենսգրքում փոփոխություն կատարելու մասին>> Հայաստանի Հանրապետության օրենքի նախագծի (այսուհետ՝ Օրենք) ընդունման արդյունքում շրջակա միջավայրի օբյեկտների՝ մթնոլորտի, հողի, ջրային ռեսուրսների, ընդերքի, բուսական և կենդանական աշխարհի, հատուկ պահպանվող տարածքների վրա բացասական հետևանքներ չեն առաջանա:

2. Օրենքի նախագծի չընդունման դեպքում շրջակա միջավայրի օբյեկտների վրա բացասական հետևանքներ չեն առաջանա:

3. Օրենքի նախագիծը բնապահպանության ոլորտին չի առնչվում, այդ ոլորտը կանոնակարգող իրավական ակտերով ամրագրված սկզբունքներին և պահանջներին չի հակասում:

Օրենքի կիրարկման արդյունքում բնապահպանության բնագավառում կանխատեսվող հետևանքների գնահատման և վարվող քաղաքականության համեմատական վիճակագրական վերլուծություններ կատարելու անհրաժեշտությունը բացակայում է:

ԵԶՐԱԿԱՑՈՒԹՅՈՒՆ

«Հայաստանի Հանրապետության քրեական օրենսգրքում փոփոխություններ կատարելու մասին» Հայաստանի Հանրապետության օրենքի նախագծի մրցակցության բնագավառում կարգավորման ազդեցության գնահատման

«Հայաստանի Հանրապետության քրեական օրենսգրքում փոփոխություններ կատարելու մասին» Հայաստանի Հանրապետության օրենքի նախագծով (այսուհետ՝ Նախագիծ) նախատեսվում է հանել կեղծ տվյալներ հայտնելու, կեղծ փաստաթուղթ ներկայացնելու կամ որևէ այլ եղանակով մեկից ավելի անգամ կամ այլ անձի փոխարեն քվեարկելու համար որպես պատժատեսակ սահմանված տուգանքը:

Նախագծով կարգավորվող շրջանակները չեն առնչվում որևէ ապրանքային շուկայի հետ, ուստի և Նախագծի ընդունմամբ որևէ ապրանքային շուկայում մրցակցային դաշտի վրա ազդեցություն չի կարող:

Հիմք ընդունելով նախնական փուլի արդյունքները՝ կարգավորման ազդեցության գնահատման աշխատանքները դադարեցվել են՝ արձանագրելով Նախագծի ընդունմամբ մրցակցության միջավայրի վրա *ազդեցություն չհայտնաբերվելու* եզրակացություն:

ԵԶՐԱԿԱՑՈՒԹՅՈՒՆ

«Հայաստանի Հանրապետության քրեական օրենսգրքում» փոփոխություն կատարելու մասին» Հայաստանի Հանրապետության օրենքի նախագծի տնտեսական, այդ թվում՝ փոքր և միջին ձեռնարկատիրության բնագավառում կարգավորման ազդեցության գնահատման

«Հայաստանի Հանրապետության քրեական օրենսգրքում» փոփոխություն կատարելու մասին» Հայաստանի Հանրապետության օրենքի նախագծի (այսուհետ՝ Նախագիծ)՝ գործարար և ներդրումային միջավայրի վրա կարգավորման ազդեցության գնահատման նպատակով իրականացվել են նախնական դիտարկումներ:

Գնահատման նախնական փուլում պարզ է դարձել, որ Նախագծով առաջարկվում է հանել մեկից ավելի անգամ կամ այլ անձի փոխարեն քվեարկելու համար որպես պատժատեսակ սահմանված տուգանքը և Նախագծի ընդունման դեպքում, դրա կիրարկման արդյունքում գործարար և ներդրումային միջավայրի վրա ազդեցություն չի նախատեսվում:

ՀԱԿԱԿՈՌՈՒՊՏԻՈՆ ԲՆԱԳԱՎԱՌՈՒՄ ԿԱՐԳԱՎՈՐՄԱՆ ԱԶԴԵՑՈՒԹՅԱՆ ԳՆԱՀԱՏՄԱՆ ԵԶՐԱԿԱՑՈՒԹՅՈՒՆ

«Հայաստանի Հանրապետության քրեական օրենսգրքում փոփոխություն կատարելու մասին» Հայաստանի Հանրապետության օրենքի նախագծի վերաբերյալ

«Հայաստանի Հանրապետության քրեական օրենսգրքում փոփոխություն կատարելու մասին» Հայաստանի Հանրապետության օրենքի նախագիծն իր մեջ Հայաստանի Հանրապետության կառավարության 2009 թվականի հոկտեմբերի 22-ի «Նորմատիվ իրավական ակտերի նախագծերի հակակոռուպցիոն բնագավառում կարգավորման ազդեցության գնահատման իրականացման կարգը հաստատելու մասին» թիվ 1205-Ն որոշմամբ հաստատված կարգի 9-րդ կետով նախատեսված որևէ կոռուպցիոն գործոն չի պարունակում:

ԵԶՐԱԿԱՅՈՒԹՅՈՒՆ**«Հայաստանի Հանրապետության քրեական օրենսգրքում փոփոխություն կատարելու մասին» ՀՀ օրենքի նախագծի՝ բյուջետային բնագավառում կարգավորման ազդեցության գնահատման**

«Հայաստանի Հանրապետության քրեական օրենսգրքում փոփոխություն կատարելու մասին» ՀՀ օրենքի նախագծով (այսուհետ՝ Նախագիծ) առաջարկվում է կեղծ տվյալներ հայտնելու, կեղծ փաստաթուղթ ներկայացնելու կամ որևէ այլ եղանակով մեկից ավելի անգամ կամ այլ անձի փոխարեն քվեարկելու դեպքում պատիժ կիրառել միայն 2-3 տարի ժամկետով ազատազրկումը՝ բացառելով պատիժը նաև նվազագույն աշխատավարձի 500-700-ապատիկի չափ տուգանքով փոխարինելը:

Ելնելով վերը նշվածից՝ հայտնում ենք, որ Նախագծի ընդունման դեպքում կգրանցվի կալանավորների թվաքանակի աճ, որը ՀՀ պետական բյուջեի վրա կարող է ունենալ բացասական ազդեցություն, սակայն ազդեցության կոնկրետ չափը հնարավոր չէ գնահատել:

Միաժամանակ հայտնում ենք, որ Նախագծի ընդունման ազդեցությունը ՀՀ պետական բյուջեի եկամուտների վրա կլինի բացասական, սակայն ազդեցության կոնկրետ չափը հնարավոր չէ հաշվարկել՝ համապատասխան տեղեկատվության բացակայության պատճառով:

Պ-959-03.03.2016-ՊԻ-010/0

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԸ**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔՐԵԱԿԱՆ ՕՐԵՆՍԳՐՔՈՒՄ ՓՈՓՈԽՈՒԹՅՈՒՆ
ԿԱՏԱՐԵԼՈՒ ՄԱՍԻՆ**

Հոդված 1. Հայաստանի Հանրապետության 2003 թվականի ապրիլի 18-ի քրեական օրենսգրքի 153-րդ հոդվածից հանել «տուգանքով՝ նվազագույն աշխատավարձի հինգհարյուրապատիկից յոթհարյուրապատիկի չափով, կամ» բառերը:

Հոդված 2. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՀԻՄՆԱՎՈՐՈՒՄ

«Հայաստանի Հանրապետության քրեական օրենսգրքում փոփոխություն կատարելու մասին» Հայաստանի Հանրապետության օրենքի նախագծի ընդունման

Համաձայն Հայաստանի Հանրապետության քրեական օրենսգրքի 153-րդ հոդվածի՝ կեղծ տվյալներ հայտնելու, կեղծ փաստաթուղթ ներկայացնելու կամ որեւէ այլ եղանակով մեկից ավելի անգամ կամ այլ անձի փոխարեն քվեարկելը պատժվում է տուգանքով՝ նվազագույն աշխատավարձի 500-700-ապատիկի չափով, կամ ազատազրկմամբ՝ 2-3 տարի ժամկետով:

2015 թվականի դեկտեմբերի 06-ին տեղի ունեցած սահմանադրական հանրաքվեից հետո բազմաթիվ քաղաքացիների մեղադրանք է առաջադրվել նշված հոդվածով^{[1][2][3]} : Բոլոր այս քաղաքացիները տուգանվել են 500.000-600.000 ՀՀ դրամի սահմաններում: Այսպես օրինակ՝ Կարինե Ստեփանյանը (No.1/07 ընտրատեղամաս) դատապարտվել է տուգանքի՝ նվազագույն 500.000 ՀՀ դրամի չափով (քրեական գործ ԵԱՆԴ/0003/01/16^[4]), Նարինե Հովհաննիսյանը (No.2/32, ընտրատեղամաս, ԵԱՆԴ/0004/01/16^[5]) տուգանվել է 500.000 ՀՀ դրամի չափով^[6] , Վարդանուշ Աթեյանը (No.8/20 ընտրատեղամաս, ԵՄԴ/0003/01/16^[7]) եւս դատապարտվել է 500.000 ՀՀ դրամի չափով տուգանքի, Գոռ Թումանյանը (No.10/15 ընտրատեղամաս, ԵԿԴ/0008/01/16^[8]) ենթարկվել է 600.000 ՀՀ դրամ տուգանքի, Մհեր Ռշտունին (No.10/14 ընտրատեղամաս) տուգանվել է 500.000 ՀՀ դրամի չափով^[9] , Վառլամ Պապիկյանը (խախտումը՝ No.34/20 ընտրատեղամասում, ՇԴ2/0003/01/16) դատապարտվել է 500.000 ՀՀ դրամի չափով տուգանքի^[10] եւ այլն: Ընդ որում, նրանցից որեւէ մեկն աշխատանքից չի ազատվել՝ դիտավորյալ հանցագործության համար դատվածություն ունենալու հիմքով:

Նշված հանցագործության հեղինակները, գողանալով այլ քաղաքացիների քվե, ոտնձգում են ժողովրդավարության դեմ, միաժամանակ ոտնահարելով նաեւ Սահմանադրությունը, որի 1-ին հոդվածով Հայաստանը հռչակվել է ժողովրդավարական պետություն: Հանրաքվեի եւ ընտրությունների միջոցով քաղաքացու՝ պետության կառավարմանը մասնակցելու իրավունքը չափազանց բարձր արժեք է, որը քաղաքացին կարող է իրացնել մի քանի տարին մեկ անգամ, եւ

քաղաքացու այդ սահմանադրական իրավունքը խախտողների դեմ պետք է կիրառվի համարժեք պատիժ՝ բացառապես ազատագրկման ձեռով:

Ինչ վերաբերում է տուգանքին, այն չափազանց մեղմ պատժատեսակ է նման արարքի կատարման համար եւ չի կարող ապահովել պատժի՝ քրեական օրենսգրքի 48-րդ հոդվածով սահմանված նպատակները: Ավելին, ակնհայտ է, որ նման հանցագործության կատարման համար անձը պետք է հետապնդի որեւէ շահ, ինչպիսին կարող են լինել իր կուսակցության շահը, հանցագործության դրդչի կամ այլ հանցակցի կողմից նյութական կամ այլ հատուցման տրամադրումը եւ այլն: Դժվար չէ կռահել, որ հանցագործության բացահայտման դեպքում, երբ որպես պատիժ կիրառվում է տուգանք, այդ գումարը վճարվում է հանցանքի «պատվիրատուի» կողմից: Այսպիսով, ո՛չ վերականգնվում է սոցիալական արդարությունը, ո՛չ հանցավորն է ուղղվում՝ գիտակցելով, որ իր արարքի համար գործում է պատիժ, ո՛չ էլ հետեւաբար կանխվում են նման բնույթի այլ հանցագործությունները, քանի որ ակնհայտ է, որ տվյալ իրավախախտման հեղինակը որեւէ անձնական պատասխանատվության իրականում չի ենթարկվում:

Սույն նախագծով առաջարկվում է քրեական օրենսգրքի 153-րդ հոդվածի սանկցիայից հանել տուգանքը՝ որպես պատժատեսակ, եւ թողնել միայն ազատագրկման ձեռով պատիժը, քանի որ այս դեպքում մեկից ավելի անգամ կամ այլ անձի փոխարեն քվեարկելու մտայնություն ունեցող քաղաքացին կգիտակցի, որ իր հանցանքի բացահայտման դեպքում նա անձամբ է կրելու իր պատիժը եւ որ այն լինելու է բավականաչափ խիստ, ինչը չի կարող ազդեցություն չունենալ խնդրո առարկա հոդվածով հանցագործությունների նախականխման գործում:

[1]

<http://newsbook.am/?p=72458/karen+andreasanyvo%D6%82xerdzi+poxaren+67+ahazangi+veraberyal+dimel+e+iravapah+marminerin+tesanyuter&l=am>

[2] <http://www.azatutyun.am/content/article/27425570.html>

[3] <http://www.azatutyun.am/content/news/27560536.html>

[4] http://datalex.am/dl_case_view_page.php?caseType=1&courtID=0&caseID=1125899906895661

[5] http://datalex.am/dl_case_view_page.php?caseType=1&courtID=0&caseID=1125899906895662

[6] <http://www.azatutyun.am/content/article/27538613.html>

[7] http://datalex.am/dl_case_view_page.php?caseType=1&courtID=0&caseID=1407374883596940

[8] http://datalex.am/dl_case_view_page.php?caseType=1&courtID=0&caseID=14355223812336343

[9] <http://www.azatutyun.am/content/article/27529668.html>

[10] <http://www.azatutyun.am/content/article/27581224.html>,

http://datalex.am/dl_case_view_page.php?caseType=1&courtID=0&caseID=29554872554668342